

ХУМУШИ



**СИЗ МАРҲАМАТ ҚИЛАСИЗ
ҲАЛИ**

Шеърлар



«Фарғона» нашриёти - 2005

84(54)6-5 Баъдий эъдиёт


Кумуш (Сайёра Солаева) 1967 йилда Хива шаҳрида тугилган. 1989 йилда ТошДУ (ҳозирги ЎзМУ) журналистика факультетини тугатган. Шеърлари республика матбуотида эълон қилинган

№ 31661
0

Кумуш.

Сиз марҳамат қиласиз ҳали. (Шеърлар).

«Фарғона» нашриёти, 2005, 64 бет.



© "Фарғона" нашриёти, 2005

КҮНГИЛ СИЗНИ ТАРК ЭТМАСИН

Қадим Хоразмнинг дунё тамаддунидаги ўрни улкан ва беқиёсдир. Биргина илм-фан соҳасини оладиган бўлсак, Абу Райҳон Беруний, Мусо Муҳаммад Ал-Хоразмий, Замаҳшарийларнинг илмий жасорати ҳали-ҳануз олам аҳлини ҳайратга солади.

Хоразмда муסיқа маданияти қанчалар қадим бўлса, сўз санъати ҳам шунчалар узоқ тарихга эга. Зеро, сўз ва соз бир-бирини тақозо этадиган, бир-бирини тўлдирадиган қўшқанот бўлиб руҳият осмонида парвоз қиладиган вобаста санъатдир. Хусусан, Огаҳий, Комил Хоразмий, Мунис Хоразмий, Феруз, Аваз Ўтар шеърятининг Хоразм қўшиқчилиги ривожда алоҳида ўрни бор.

Гап шеърят ҳақида борар экан, нисбатан бизга яқинроқ замонлар - ўтган асрнинг 60-йилларида ва бундан кейинроқ адабиёт майдонига кириб келган Эркин Самандар, Омон Матчон, Матназар Абдулҳаким каби забардаст хоразмлик ижодкорларни эсламасдан илож йўқ.

-Хоразм қомусий билимга эга бўлган буюк алломалар, ҳофизлар, шоирлар бешиги эканлиги исбот талаб этмайдиган ҳақиқат, - дейди ҳамсуҳбатим фикримни қувватлаб. - Фақат, нима десам экан, битта "кемтик" жойимиз бор: мумтоз адабиётимиз тарихидан анча-мунча хабардорман: нега Хоразмдан шоирлар чиқмаган, дейлик Нодира, Увайсий, Зебунисоларга ўхшаган...

-Халфалар-чи! - дейман ҳамсуҳбатим билан баҳсга киришиб, - инсоният руҳиятини баравж пардаларда тараннум эта олган халфалар қайси шоирлардан кам?! Эҳтимол, бу файзли сарзаминнинг руҳий-маънавий қуввати бир-иккита ижодкор аёлга оғирлик қилиб, юзлаб халфалар сиймосида намоён бўлгандир?

...Бу баҳсли мулоҳазалардан муддао хивалик синглимиз Сайёрани сиз азиз китобхонларга таништириш эди. Эҳтимол, Сайёра ҳам мен юқорида айтиб ўтган ўша илоҳий қувватнинг XXI асргача етиб келган битта тўлқинидир. Фольклор

унсурлари, халқона оҳанглар ижодида баралла бўй кўрсатмасида, Сайёранинг ҳам халфалиги бор. Халфалиги шу маънодаги, у аёл кўнглини бор нафосати, қувончи, фожеалари билан мардона кўйлайди. Мен бу гапларни осмондан олиб ёзаётганим йўқ. Сайёранинг дардли сатрлари, ўйлайманки, сизни ҳам бефарқ қолдирмайди. Масалан: (иқтибосни ёйма шаклда келтиряпман, узр!)

*Яшамок ҳам келса-я малол, Севмоқ эса ўлим билан тенг.
Дунё нега бунча экан тор, Дунё нега бунча экан кенг?!*

Ёки:

*Энди сендан яширмайман мен, Қалбга сени гизлаганимни.
Ўзим сендан кечиб туриб ҳам, Ўзим сени излаганимни.*

Ва ниҳоят:

Сиз мени севсангиз арзимамайманми, Осмонлар ўзилиб тушами ерга.

Мен сиздан кетмайман энди ҳеч қачон, Кетсам ҳам вақтинча кетаман шеърга.

Шу ўринда Сайёра билан баҳслашиш мумкин “Шеърга вақтинча кетиб” бўлмайди. Шеър ҳам худди муҳаббатдек кўнгили иши. Шеър ҳам ўта нозик, инжик, эътиборталаб, масъулият талаб юмуш. Шеърни кўнгили иши дедик. Янада аниқроқ этсак, у айнан кўнгилининг ўзидир.

Кўнгили сизни ҳеч қачон тарк этмасин!

Муҳаммад РАҲМОН,
*Ўзбекистон Ёзувчилар уюшмаси аъзоси,
Республикада хизмат кўрсатган маданият ходими.*

БАХТДАН САРХУШ БЎЛАЙИН

Интилганга толе ёр дердинг,
Сен бир ўзинг ғамимни ердинг,
Бугун мени кимларга бердинг,
Дардлар бериб суйган, худойим,
Мени кўзи қийган, худойим.

Сомондан-да сарғайди юзим,
Ёшга тўла бегуноҳ кўзим,
Нима қилай ёлғиз бир ўзим.
Сенсиз ҳолим жуда паришон,
Ёлғиз сени суйдим мен, ишон.

Тақдирга тан бердим, ниҳоят,
Ҳаётни мен севдим бағоят
Бахтли бўлсам эди деб, шояд,
Умидимдан айира кўрманг,
Қанотимни қайира кўрманг.

Қушлар учса қаноти куйган,
Тоҳир-Зухро бир-бирин суйган,
Борми ўзи бахтни ҳам туйган,
Дардни берар давоси билан,
Одам Ато Ҳавоси билан.

Бир кун тугар сабримнинг сабри,
Бу ҳаётнинг бўлди кўп жабри,
Ёлғиз қолди севгимнинг қабри,
Хотиралар сизсиз қийин-ку,
Ҳаёт қизиқ, ёмон ўйин-ку.

Ҳаётдан мен бездим демайман,
Қайгулардан тўздим демайман,

Ё олдинга ўздим, демайман,
Ҳаёт ширин жафоси билан,
Жафо эса сафоси билан.

Ҳали биз кўрмаган кунлар бор,
Айтилмаган сукут-унлар бор,
Олинмаган қасос, хунлар бор,
Бахтдан, ахир, сархуш бўлайин,
Кейин майли, майли, ўлайин.

ТҶМАРИСЛАР ҲТГАН ЗАМИН БУ

Тўрт мучасин соғ қил, худойим,
Рўё бўлсин ёмон хаёли.
Юрагини тоғ қил эркакнинг,
Йиғламасин унинг аёли.

Эгилмасин ҳеч қачон боши,
Пари қизлар бўлсин хаёли.
Тўмарислар ўтган замин бу,
Ғурурни бахт билсин аёли.

Ор-номуси баланд йигитнинг,
Кўкрагида бўлсин шер ёли.
Уйида бек бўлсин, хон бўлсин,
Вазир бўлсин хоним аёли.

Худо назар солган заминни,
Айтишади, жаннат мисоли.
Йигитларни кўздан асрагин,
Илло, бахтли бўлсин аёли...
Йиғламасин сира аёли...

ЮРАГИНГИЗ МЕҲМОНИЮ МЕЗБОНИ БЎЛАЙ

Мен сўрайман, сизнинг учун Яратгандан иймонни,
Дунёлардан кечгум, ахир, айтинг, менга осонми?
Худойимнинг ваъдалари - у эртанимиз омонми?
Юрагингиз меҳмонию мезбони бўлай ўзим...

Йўлларимда учраган сел, жала мени эзмади,
Юрагимдан у оққан қон, манглаймдан сизмади,
Не сирдир бу, ёраб жоним, қаҳрингиздан безмадим,
Юрагингиз меҳмонию мезбони бўлай ўзим...

Меҳрингизга қонмай туриб, сизга бердим меҳрлар,
Эвазига сиз ҳам берманг, мен кўрганман қаҳрлар,
Бир кун келиб ечилади жодуланган сеҳрлар,
Юрагингиз меҳмонию мезбони бўлай ўзим...

Тилак тиланг, шу заҳоти мен ижобат қиламан,
Изн беринг, аламларни дуоибад қиламан,
Пойингизга тўкилайин, минг айланиб ўргулиб,
Гуноҳимни ювиб бир кун ибодатлар қиламан,
Юрагингиз меҳмонию мезбони бўлай ўзим!



ҲАР ҲОЛДА УМИД БОР

Ер билан бир бўлиб бормоқда,
Вужудим ҳеч ерга сиғмайсан.
Мендан нари кетмаган ҳасрат,
Нега яхши кунни туғмайсан?

У, ҳаммани сийлаган тақдир
Нега менга кулиб боқмайди?
Оққан дарё оқаверса гар,
Менинг дарём нега оқмайди?

Ҳар дам менга ён босган сабр,
Нега энди тушунмайсан, айт?
Бугун жуда кераксан, ахир,
Ташлаб кетма мени шундай пайт!

Сен бунчалик бўлма бешафқат,
Шу ёшимда этма ноумид.
Эртанг яхши бўлади дегин,
Ҳар ҳолда умид бор, бир умид...



ЭНГ КАТТА ОРЗУМ

Ўйларим жуда кўп, аммо кўп ўйлаб,
Нима ҳам орттирдим ботиб хаёлга.
Билсангиз, дунёда энг катта орзум,
Яшашни истамоқ, ўхшаб аёлга.

Ўзим айбсизману айбдор ҳаётдай,
Юрибман ҳаммасин мен ундан кўриб.
Бахтли бўлар эдим, агар яшасам,
Қизимнинг сочини йилда бир ўриб...

О, қандай зўр фикр, бу янги ғоя,
Режага солмоқлик эртанги кунни.
Ҳаммани ўйлайман, бироқ билмайман,
Яхши ўтмоқдами ўғлимнинг куни.

Ўзимни ўйлашга, топа олсам вақт,
Ўтирсам гулларга кўмиб хонамни.
Гулларни севишдан, ахир не фойда,
Бориб кўролмасам отам-онамни?!

Орзу қилмоқликнинг нимаси ёмон?
Ажабмас, рўёбга айланса хаёл.
Бир куни келади, ана ўшанда
Топилмас мендан-да бахтиёр аёл!

МЕНИНГ ИБОДАТИМ

Косонсойлик Ал-Мўминнинг айтганлари...

Тангри инъомидир бу, бу - менинг саодатим, •
То тирикман ташламам, Аллоҳ берган одатим,
Қўлим кўксимда доим - шу менинг ибодатим
Нега хурсанд бўлмайин, ярасам эл корига...

Фақат бойлик билан ҳам бахтли бўлиб бўлмайди,
Қувонч билан туғилиб, ғам-ла ўлиб бўлмайди,
Энг ёмони инсоннинг қалбин билиб бўлмайди,
Ўйнамадим, барибир, ҳар кимларнинг торига...

«Олтин олма, дуо ол» деган гаплар рост экан,
Бу дунёнинг ғами кўп, қувончлари оз экан,
Кўнгли ярим инсонга кўнгил бериш соз экан,
Бир хил билиб қарадим бой, камбағал барига...

Онам мўмин бўлсин деб, исмим Мўмин қўйибди,
Минг бор шукур Худога, назар солиб, суйибди,
Меҳр кўзда, меҳрни ким ҳам сиздан қийибди,
Бугун шукур қиламан, Яратганнинг борига... •

ЗАРДЎЗИНГИЗ

(Қизим Фаридага)

Отасига ўхшаган қиз бахтли бўлармиш...

Дуоларга очинг қўлларни,
Яхши бўлсин гапу сўзингиз.
Қизингизни севинг оталар,
Қиз эмасдир, у - зардўзингиз.

Ортиқ кўринг ўғилдан ҳатто,
У меҳрибон қоракўзингиз.
Бугун мезбон, кун келиб меҳмон,
Оқ фотиҳа беринг ўзингиз.

Қиз туғилса, тўй қилинг хурсанд,
У ҳам сизнинг босган изингиз.
Отасига ўхшамаса ҳам,
Бахт-иқболли бўлсин қизингиз.



ЮРАГИНГИЗ БЕРСАНГИЗ БЎЛДИ

Сиз хоҳланг, мен сизга тоғ бўлгум,
Тоғлардай қудратли кучим бор.
Эвазига бахтни кўрсатинг,
Аламларда менинг ўчим бор.

Сиз - худодан сўраган илинж,
Илинж билан қалб уйим тўлди.
Кўп нарса керакмас, азизим,
Юрагингиз берсангиз бўлди.

ЭНДИ СИЗ ДЕБ ЎЛАЙИН

Қиёматлар қўпар агар, агар мендан кечсангиз,
Сиз буюринг, етиб келгум, бирор тугун ечсангиз,
Розимасман, ишқ шаробин, ҳайҳот, менсиз ичсангиз,
Сизни севдим, сиз деб келдим, энди сиз деб ўлайин...

Не ишқдир бу, барбод кўнглим энди обод қиларму?
Ярим кўнглим ғариб эди, энди у шод қиларму?
Ўзи тузди, ўзи бузди, энди бунёд қиларму?
Изн бергин, кўнгилгинам, энди мен ҳам тўлайин...

Юрагимга гуллардан ҳам кўпроқ тиконлар ботган,
Бу туннинг ишқи билан не-не тонг бедор отган,
Аламми у, ҳасадми у, менинг бахтимни сотган,
Оқ фотиҳа беринг энди, мен ҳам бахтли бўлайин...

Қиёматлар қўпар агар, агар мендан кечсангиз,
Сиз буюринг етиб келгум, бирор тугун ечсангиз,
Розимасман ишқ шаробин энди менсиз ичсангиз,
Сизни севдим, сиз деб келдим, энди сиз деб ўлайин...

ҚИЁМАТГА ҚОЛМАСИН ДИЙДОР

Мен шунча йил алдаб яшадим,
Армонларга бой бериб ўзни.
Минг хил кўйга тушганим-ку рост
Алдамадим, бироқ мен сизни.

Мен яшашни истадим фақат,
Истамадим ўткинчи ҳисни.
Гар бўлса-да ҳаёт бешафқат,
Алдамадим, бироқ мен сизни.

Қиёматга қолмасин дийдор,
Худо қўшсин тақдиримизни.
Йўқса, ҳаёт менга не даркор?
Мен севаман, ишонинг, сизни.

ЯХШИ ЭДИ У ЎТГАН КУНЛАР

Яхши эди у ўтган кунлар,
Гўзал эди бокира туйғу.
Бугун мени ёмон қийнайди,
Юрагимга сиғмагани қайғу.

Бугун менинг душманам алам,
Бугун менинг душманам пушмон.
Мен ҳеч нарса эмасман сенсиз,
Қанотлари қирқилган қушман.

Сенсиз жуда-жуда қийналдим,
Сенсиз жуда аҳволим қийин.
Энди яшаб кетмоғим гумон,
Энди кетиб қолмоғим тайин.
Яхши эди сен бор у кунлар...

ХУДО, ЁЛГИЗ ҚИЛМА АЁЛНИ

О, она, мен сизни соғиндим,
Уззукун қўмсайман сизни-да, ота.
Нега сиздай яшай билмадим,
Бошдан-оёқ ҳаётим хато.

Нега осмон ёқади менга?
Лойдан бино бўлган-ку жисмим?
Қўй, яхшиси, мен ерга тушай,
Бўлса ҳамки Сайёра исмим.

Баландпарвоз орзулар тамом,
Чарчадим, рост, суриб хаёлни.
Нима қилсанг, қилгину худо,
Фақат ёлғиз қилма аёлни.

ЖОНИМНИ ҚИЙНАМА, ЖОНИМ

Кўнглим танҳо сени истаса, нетай,
Нозу фироғингдан ўргулиб кетай,
Бир кун келиб, ахир, муродга етай,
Бунчалик қийнадинг жонимни, жоним...

Менинг ёш бошимни азобга қўйган,
Мени эмас, балки ўзгани суйган,
Шунданмикан мени юрагим куйган,
Бунчалик қийнадинг жонимни, жоним...

Гоҳ ёмон бу ҳаёт, гоҳида яхши,
Ёлғиз сен ўзингсан ҳаётим нақши,
Мен оддий шоирман, оддий бир бахши,
Сенинг-ла мунаввар менинг ҳар оним,
Бунчалик қийнама жонимни, жоним...

ҲАЛИ ШУНДАЙ КУНЛАР КЕЛАДИ

Ҳали шундай кунлар келади,
Ҳайрон қилиб ҳаммани ҳали,
Уялиб қолади шубҳасиз,
Бермаганлар менга тасалли.

Бир пайтлари йиглаганман, рост,
Бугун бошқа бўлди юрагим.
Тақдирга тан бердим, ниҳоят,
Сизнинг учун ўлди юрагим.

Яхшими, ёмонми яради,
Кўзларимга суртаман вақтни.
Мен ҳали шошиб ҳам қоламан,
Кўтаролмай оғир юк - бахтни.

Ҳали шундай кунлар келади.

АЛДАШДАН ҚЎРҚАМАН

Мен сизни алдашдан қўрқаман,
Сира бунга қолмасин куним.
Қарғашдан-ку, худо асрасин,
Олсин ўзи, ҳар қанча хуним.

Худойимга не ёзган эдим,
Хато қилиб, сира тўймадим.
Мени суймаганини суйдим,
Суйганларни эса суймадим...

МУҲАББАТ ДЕБ ЎЛАЙМИ ЭНДИ?!

Ўзингни тут, қийин бўлмоқчи,
Юрак, сенга керак бардошлар.
Ҳали керак бўласиз менга,
Тўкилмайин турингиз ёшлар...

Муҳаббатдан туғилганим рост,
Муҳаббат деб ўлайми энди?!
Ўн гулимдан бир гулим ҳам, айт,
Очилмайин сўлайми энди?!

Биламанки, бари беҳуда,
Шундай бўлган, шундай бўлади.
Нафратлардан ўлмаган юрак,
Муҳаббат деб наҳот ўлади?

Кўнгил, сенга кўнгил берайми,
Бўлса ҳамки, ўз кўнглим ярим.
Беҳудага алдама, етар,
Зорим бору, йўқ сира зўрим.

Бир кун келар, унутилар дард,
Шундай бўлган, шундай бўлади.
Сайёрани излаб келган мард,
Керак бўлса у деб ўлади.

ХУДО, СЕНИНГ БОРЛИГИНГ ЯХШИ

Худо, сенинг борлигинг яхши,
Яна менга ёрлигинг яхши,
Яхшиларга кенг бўлсин дунё,
Ёмонларга торлиги яхши.


Кўзларимга ишонмаяпман,
Йўқотганим, бахтимми топган?
Минг бор шукур, сенга худойим,
Бугун менинг омадим чопган.
Худо, сенинг борлигинг яхши.

СОГИНДИМ...

Согиндим, хиёнат этса ҳам,
Мендан-да воз кечган йилларни.
Титрайди азобдан вужудим,
Кўриб барвақт сўлган гулларни.

Не учун кўникай ҳаётга,
У менга кўнмаса, севмаса.
Мен қандай яшайин хотиржам,
Орзулар кўймаса, ўлмаса.

Айб мендами, даъвогар кўнгил
Истагидан кечмаса юрак?
Бу дунёдан кечиб бўлмаса,
Айтинг, қандай яшамоқ керак?



СИЗДАН БОШҚА ЙЎҚМИДИ МЕНГА...

Сиздан бошқа йўқмиди менга?
Асли сизга туйғуларим ҳайф.
Сизни севиб нима орттирдим?
Сизга ҳатто, қайғуларим ҳайф.

Муҳаббатнинг кўзлари кўрми?
Наҳот, ишқнинг шароби тахир?
Шўр пешона бўлмасам агар,
Сизни севиб қолмасдим, ахир,
Сиздан бошқа йўқмиди менга...

ОРЗУ ИЗТИРОБИ

Мен ўзимни овутдим, наҳот,
Яхши отлар чопар деб кейин.
Қайғу чекмоқ, балки, ортиқча,
Яхши кунлар келиши тайин.

Саодатни этганман орзу,
Йиғлаганим, балки, бекорга,
Балки катта хатом ҳам шудир!
Осилганман энг баланд дорга...

ЮРАГИНГИЗ ЎҒРИМИДИ?

Юзингизни мендан буриб
Кетишингиз тўғримиди?
Юрагимни ўғирлаган
Юрагингиз ўғримиди?

Не кўрсангиз менгинадан
Кўришга ҳеч борми асос?
Сизни солдим мен худога,
«Миналҳақу ал-қасос»!

Сиз устозсиз бу йўлда,
Бу йўлда мен толибман.
Сиз-чи, мағлуб бўлдингиз
Мен аслида голибман.

Ниятига етганларим
Майли ёмон бўлингиз.
Сизга йўқдир гинам менинг
Энди омон бўлингиз.

Ачинмайман ўтган умр,
Ўтган куним - тақдирга.
Фақат, эссиз, хотиралар,
Сиз билан қолди бирга.

Ачинман, бугун, рости,
Сағир қолган туйғумга.
Сиз сизмаган юрагимдан
Жой бераман қайғумга.

Ғийбатларга ишониб
Кетишингиз тўғримиди?
Юрагимни олиб қолган
Юрагингиз ўғримиди?

КУЙГАН БУ ДИЛИМНИ КУЙДИРДИ ЁМОН

Менинг кимлигимни эл билса бўлди...

О. Матчон

Душманни дўст билиб, доим адашдим,
Кулгуни йиғига бекор алмашдим,
Шунданми, билмадим, йўқ менинг шаштим,
«Менинг кимлигимни эл билса бўлди...».

Бўрининг оғзи қон, еса-емаса,
Эл оғзига элак тутиб бўлмаса,
Майли, у кимлигим билса-билмаса,
«Менинг кимлигимни эл билса бўлди...».

Куйган бу дилимни куйдирди ёмон,
Мени суймаганни суйдирди ёмон,
Ёш жонни жонидан тўйдирди ёмон,
«Менинг кимлигимни эл билса бўлди...».

СЕН УЧУН ҚАЙТАДАН ТУҒИЛДИМ

Мен сени қанчалар кутдим-а,
Қанчалик бўлдим-а интизор.
Нечоғлик куюндим ишқингда,
Бўлиб хор, бўлиб зор, бўлиб ёр.

Гоҳида ўлдирди аламлар,
Гоҳида қувончдан бўғилдим.
Лекин, мен, барибир, ишонгин,
Сен учун қайтадан туғилдим.

Оҳ, нелар кечмади, бу бошдан,
Қанча тунлар ўтмади бедор?
Яратганга беҳисоб шукур,
Кечикса-да, келди-ку баҳор!

ДИЛИМ ЁНИБ КЕТАПТИ

Айтинг, Она, мен нима қилай,
Ҳеч ўзимдан кўнглим тўлмаса?
Кўпдир сохта харидорларим
Лекин улар Мажнун бўлмаса?

Айтинг, Она, мен нима қилай,
Бахтни кўрсам, лекин тутмасам?
Мени, айтинг, ўзи кечирсин
Бир умрга уни кутмасам?

Дилим ёниб кетяпти, она,
Яхши эди уйим ёнгани.
Керагича туйдим ғам-алам
Қани унинг бахтдан қонгани?

Дилим ёниб кетяпти, она,
Рози бўлинг, майли, мен ўлай.
Агар у ҳам Мажнун бўлмаса,
Юрагимни бир умр илай, *

Она, айтинг, мен нима қилай?!

* Илай - қулфлай (шева).

ЎТГАН КУНИМ...

Ўтган куним - ўтганларим,
Нечун жуда тотлисан?
Афсус, сен-ла қололмайман,
Ахир, ўтмиш отлисан.

Ўтган куним ўтган кундир,
Энди ундан фойда йўқ.
Қўй, кўнглингни бузма, у бахт
Кўз ёш тўккан жойда йўқ.

Ўтган куним ўтди-кетди
Ўтган кун деб йиғлайми?
Ҳали кўпдир орзуларим
Мен хотиржам ухлайми?

Кўнгил энди, нелар қилсин,
Қолиб содиқ у аҳдга?
Кўрганлари нима бўлди,
Нолойиқми ё бахтга?

Мени бугун аламларга,
Ўртоқ қилди муҳаббат.
Шер юрагим бор эди-ку,
Қўрқоқ қилди муҳаббат.

Ўтган куним - ўтганларим,
Сен барибир, тотлисан.
Афсус, сен-ла қололмайман,
Ахир, ўтмиш отлисан...

ҲАЁТ, МАРҲАМАТИНГ АЯМА МЕНДАН

Ҳаёт, марҳаматинг аяма мендан,
Ойнинг ўн бешин ҳам қилма қоронғу.
Ишонтир, дунёда бари ўткинчи,
Бу ҳаёт арзимас чекишга қайғу.

Ишонтир, дунёда севги йўқ нарса,
Худодан бошқаси ёлғон, инондим.
Изтироб чекишга арзимасанг ҳам,
Мен телба ишқингда беҳуда ёндим.

Умр деганлари ёлғончи нарса,
Ростликка хиёнат этди туйғулар.
Беғуноҳ юрагим севди шодликни
Юрагимни эса севди қайғулар.

Бевафо умрда бечора севги,
Афсус қилайинми ўтган умрга,
Эҳтимол, дунёда бари ўткинчи,
Муҳими, юрагим мен билан бирга.



ИМКОНЛАР ТИРИК

Бунчалик руҳингни чўқтирма, она,
Тўлмаган кўнгиллар бир кун тўлади.
Оққан дарё, ахир, оқмасдан қолмас,
«Бизнинг кўчада ҳам байрам бўлади».

Бугунни амаллаб ўтказайлик, кел,
Эрта не бўлишин худо билади.
Ўн беши ёруғдир қоронғу ойнинг,
«Бизнинг кўчада ҳам байрам бўлади».

Имконлар ўлмаган, имконлар тирик,
Ишон, ўтган кунлар яна келади.
Билсанг, она, ана ўшанда,
«Бизнинг кўчада ҳам байрам бўлади».



СЕН МЕНИ КЕЧИРГИН, ЮРАГИМ

Сен мени кечиргин, юрагим,
Мен туфайли кўзларингда ёш.
Мен туфайли бунда барчаси,
Мен деб бўлдинг ҳатто бағритош.

Менда нима қасдинг бор эди,
Нега мени алдадинг, баҳор?
Нега менга хиёнат қилди,
Севаман деб у бевафо ёр?

Остонамда тўхтаб қолган бахт,
Нима қилай яна сен учун?
Мен-ку, ўла билдим сени деб
Куясан сен қачон мен учун?

Кўзларимни кўр қилган, севги,
Ҳеч бўлмаса, сен қилма зулм.
Ҳеч бўлмаса, сен мени севгин,
Фақат мени севмасин ўлим!...
Сен мени кечиргин, юрагим...



КУРАШАДИ САВОБ - ГУНОҲЛАР

Умр ўтиб кетмоқда, эссиз,
Аро йўлда қолдириб бизни.
Мен эса... мен эса, барибир,
Фақат сизни... севаман сизни...

Тўқнашади ҳар кун нигоҳлар,
Айтолмайман, аммо у сўзни.
Курашади савоб-гуноҳлар,
Тушунмайман бироқ мен ўзни...

О, биламан, ҳаммаси аён,
Сиз севмайсиз мендайин қизни....
Кўнгил эса яшайверади,
Тавоф этиб, сиз босган изни...



КЎРГУЛИКЛАР БИР ЎЗИМНИКИ

Энди сиздан гина қилмайман...

3. Эгамбердиева

«Энди сиздан гина қилмайман»,
Сиз деб энди гуллар термайман.
Кўргуликлар бир ўзимники,
Қўрқманг, уни сизга бермайман.

Йўқ эдингиз бор қилдим ўзим,
Энди эса йўқсиз мен учун.
Сиз менинг энг буюк хатомсиз,
Хато кетган ўқсиз мен учун.

Бу не йўқдир, бу не аросат,
Манзилга ҳеч етиб бўлмаса,
Сиз ҳам шуни хоҳлаган билан,
Сизни ташлаб кетиб бўлмаса,

Энди сиздан гина қилмайман...



МЕН ЭРТАГА БАХТЛИ БЎЛАМАН

Сиз эртага келасиз...

Салим Ашур

Сиз эртага келасиз, тўғри,
Буни ҳатто ўзим биламан.
Эртага бир кун бор, ахир,
Эртагача балки ўламан.

Шунча кутдим, о, бир кун нима,
Майли, яна сабр қиламан.
Сабр таги сариқ олтин-ку,
Шамол каби бедор еламан.

Чин дўст нима, чин севги нима,
Энг муҳими, энди биламан.
Сиз эртага келасиз ва мен
О, эртага бахтли бўламан.

Сиз эртага келасиз, тўғри...



БИР КУНИ МЕН УЧИБ КЕТАМАН

Боримда сиз мени билмайсиз,
Қадримга етмайсиз ҳеч қачон,
Бир куни мен учиб кетаман,
Уйимга айланар кенг осмон.

Бекорга сиз мenden ранжиманг,
Гуноҳлар воз кечди сабримдан,
Сиз учун хўп йиғлаб, хўп куйдим
Энди сиз ҳам йиғланг жабримдан.

Кетсам ҳам зор қилиб кетаман,
Қадамим - ҳар босган изимга.
Сиз ҳали мени кўп эслайсиз,
Ҳали зор бўласиз исимга.

Сиз мени билмайсиз ростдан ҳам,
Қадримга етмайсиз ҳеч қачон.
Бир куни мен учиб кетаман,
Уйимга айланар кенг осмон.



ХУДО БЕРСИН МЕНГА САБРНИ

Хаёт қийин дарс экан жуда,
Яшаш жуда оғир бўляпти,
Ростдан кўра ёлғонлари кўп,
Дунёлардан кетгим келяпти.

Нима бўлди, нимаяар бўлди,
Нечун машқим бугун бунча паст?
Нечун менинг яшагим келмас,
Ёмонларга, ахир, қасдма-қасд?

Кечир мени, кечиргин, юрак,
Энди менга ён босма, майли.
Шундоқ ҳам жуда кўп қийнадим,
Қийналдинг ёлғиз мен туфайли.

Худо берсин менга сабрни,
Назарини эса олмасин,
Мен-ку, майли, чидайман, фақат,
Унинг мендан кўнгли қолмасин.



ЯШАМОҚ ҲАМ КЕЛСА-Я МАЛОЛ

Яшамоқ ҳам келса-я малол,
Севмоқ эса ўлим билан тенг.
Дунё нега бунча экан тор,
Дунё нега бунча экан кенг?

Мен қаерда хато қилдим, айт,
Мен ўзи қаерда адашдим?
Ўлгим сира келмаяптию,
Яшашга ҳам йўқ ҳатто шаштим.

Ортиқ бундай яшаб бўлмайди,
Сабримнинг ҳам косаси тўлган.
Феълимдан-ку, кўнглим тўлмайди,
Уни мен деб бўлари бўлган...

Яшамоқ ҳам келса-я малол.





Оиласи даврасида.



Устозлар даврасида. Чолдан Собир Ўнар «Ёшлик» журнали бош муҳаррири, ёзувчи, Сирожиддин Саййид Ўзбекистон Ёзувчилар уюшмаси раисининг биринчи уринбосари, шоир Луқмон Бўрихан, «Ёшлик» журнаlining бош муҳаррир ўринбосари, ёзувчи.



Косонсойлик дўстлар даврасида. Чапдан Хурматой Қудратова - Косонсой туман ҳокимлигининг Маданият ва спорт ишлари бўлими мудири, Ҳамидaxon Нажмиддинова - шифокор, Мўминжон Қосимов ва Тоҳирахон Мўйдинова Косонсой туман ҳокими ўринбосари.



Шоир Зиёвуддин Мансуров ва Мўминжон Қосимовлар билан.

ЎНГИМДА ҲАМ КЕЛГИН ҲУМО ҚУШ

Бу умр ганимат аслида,
Сизгача ҳам ёлғон дунё бу
Аввалдан бири кам яралган,
Бизгача ҳам қолғон дунё бу.

Тақдирга берайми тан энди?
Тиз чўкиб аламлар қошида?
Фарзанднинг доғини кўрсатма
Йиғламай боламнинг бошида.

Керакдайман ҳаммага гўё,
Аслида мен кимман, айт, ахир,
Кулмайди мен учун бу дунё
Не учун боқмайди, ё тақдир.

Гўёки мендан-да яхши йўқ,
Яхшилик қилиб ҳеч тўймайман
Мен телба ва ёки бир ношуд?
Ўзимни негадир суймайман.

Эскидан халқимда гап қолган
Боқиш ҳам керакдир замонга.
Майлига мен унга боқаман,
Боқарми у ҳам мен томонга.

Ўзим-чун, айт, қачон яшайман?
Бахтданми бўламан ё сархуш?
Қўраман тушимда кўп сени
Ўнгимда ҳам келгин, Ҳумо қуш.

Кетмангиз, орзулар, кетмангиз,
Армонни жиним ҳеч суймайди.
Дардини берганим-худойим,
Давосин бермасдан қўймайди.

БУНЧА ОҒИР СИЗГА ҚАРАШ

Бунча оғир сизга қараш, эй, сиз сохта нигоҳлар,
Бўлди, энди сиз ҳам кетинг, сиздан бездим гуноҳлар,
Қилмаганман ҳеч, барибир, мен бекорга оҳ-воҳлар,
Кеча кўрган тушим эрта рўё бўлса, не ажаб...

Текис эмас экан йўллар, тўғри, кўрдим кўп жафо,
Ҳавас қилдим, бек ишқини, армон бўлди лек вафо,
Умр бўйи орзу қилдим, кўрмадим аммо сафо,
Хун йиғлаган ярим кўнглим шояд кулса, не ажаб...

Шу ёшда ҳам билмасам, ким яхшию ким ёмон,
Ёмон қолиб, яхшиларга нега кун йўқ бу замон,
Кўрмагани қолмаса-да, яхшиям юрак омон,
Бир кун келиб бўшаб қолган юрак тўлса, не ажаб...



МЕН УЧУН ЎЗИНГИЗ БОРСИЗ

Дунёда гуллар кўп, чаман кўп, бироқ,
Ҳар бирин ўз ўрни, иси ўзгача.
Қалбимни қийнайди, фақат бир сўроқ,
Мен нега яшадим сизсиз сизгача?

Ўртада узун йўл ётар ястаниб,
Ўртада довон бор қорли ва қорсиз.
Мен шукур қиламан, ахир, дунёда
Муҳими, мен учун ўзингиз борсиз...

Сиз менинг бир умр кутганим - ёрсиз.

МАЙЛИМИ, МЕН СИЗГА ТОҒ ДЕБ СУЯНСАМ

Майлими, мен сизга тоғ деб суянсам,
Тоғ каби суянчиқ, бўлоласизми?
Буюринг, не қилай, мен яна сизга,
Керагида сиз ҳам ўлоласизми?

Йўқса, айтинг, менга, юрмай беҳуда
Парвона мисоли қанотим куйиб,
Бор бойлик, ихтиёр кетди қўлимдан,
Куним қолгач сизга, мен сизни суйиб,

Майлими, мен сизга тоғ деб суянсам.

ХУДОЙИМ ҲАМ ЁРДИР-КУ!

Сен замонга боқмасанг, замон сенга боқмайди,
Оқиб турган дарё ҳам билсанг, агар оқмайди,
Сен-чи, унга ёқасан, у-чи, сенга ёқмайди,
Сен кимга зорсан бунда, кимлар сенга зор унда...

Бунча шафқатсиз дунё, бир туғилиб минг ўлдим,
Нима айбим бор эди кўп йиғладим, кам кулдим,
Куним қолиб номардга саҳрода сароб бўлдим,
Сен кимга зорсан бунда, кимлар сенга зор унда.

Кўнглим олмоқ бўлганлар фақат кўнглим қолдирди,
Дўст деб билдим, душманлар мажруҳ руҳим ўлдирди,
Гул мисоли қалбимни бўронларми сўлдирди,
Сен кимга зорсан бунда, кимлар сенга зор унда.

Бу кунларнинг ҳам бир кун ўтмоқлари бордир-ку,
Ёмонлик қилганларнинг, эрталари хордир-ку,
Худо деганларига худойим ҳам ёрдир-ку,
Сен кимга зорсан бунда, кимлар сенга зор унда.



СЕН ОЛДИМГА ҚАЙТГИН, ҲУМО ҚУШ

Тақдир экан, пешонада бор экан,
Аввал топиб, кейин эса йўқотиш.
Ёзғитимга не ёзилган кўраман,
Фақат сен олдимга қайтгин, Ҳумо қуш.

Сени йўқотганим кўп ёмон бўлди,
Яхшиям бошгинам, о, омон бўлди,
Бахтимга юрагим мен томон бўлди,
Фақат сен олдимга қайтгин, Ҳумо қуш.

Билмагани, ахир, худо кечирар,
Бир кун шароб, бир кун заҳар ичирар,
Дунёда неки бор, охир, ечилар,
Фақат сен олдимга қайтгин, Ҳумо қуш.

Ҳеч нарсам қолмади сабрдан бўлак,
Раҳм қилармикан, менга ҳам фалак,
Қалбимда биргина, биргина тилак,
Фақат сен олдимга қайтгин, Ҳумо қуш.



СИЗНИ СЕВИШ КЕЛАР ҚҰЛИМДАН

Сизни севиш келар қўлимдан,
Бошқасига кучим етмайди.
Бекорга оғритманг, дилимни,
Дил яраси кейин битмайди.

Чарчамадим айтиб севгимни,
Сиз мени эшитиб чарчаманг,
Ҳисларимни ўйнашдан кўра,
Юрагимни, майли, парчаланг.

Ахир, қирқта жоним бор менинг,
Қирқ бирига ҳам чидай, майли.
Сиздан, наҳот, Мажнун чиқмаса?
Мендан, наҳот, чиқмаса, Лайли?!

Бошқаришга сизни йўл бўлсин,
Нима қилсин менда сеҳрлар.
Чин юракдан севганман сизни,
Ва берганман оддий меҳрлар.

Сизни севиш келар қўлимдан,
Бошқасига куч олай қайдан?
Фақат кетиб қолмасам бўлди,
Туйғуларим хўрланган жойдан!

Сизни севиш келар қўлимдан...

МЕН ДУНЁДА ЭНГ БАХТЛИ АЁЛ

Бу кунларнинг борми охири,
Шу сўнггисин оқ қил илойим,
Ишқ деб, наҳот, ботдим гуноҳга,
Ғуноҳимни кечир, худойим.

Мен севмадим, ахир, бойликни,
Хиёнат ҳам қилмадим аҳдга.
Билмаганим кечиринг, аммо
Лойиқ қилинг сиз мени бахтга.

Асов отдай чопмоқда умр,
Бу не умр шамолдай елса.
Мен баҳордан кечаман, агар
Баҳор менга унингсиз келса.

Алдашга ҳеч уринманг мени
Йўлдан урманг, сиз сотқин хаёл!
То ҳаётман, севаман уни
Мен дунёда энг бахтли аёл.

КЕЧИРИМ

Кечирим сўрайман дов-дарахтлардан,
Кечирим сўрайман, гуллардан, ердан.
Сен ҳам мени кечир, эй азиз дўстим,
Устун қўёлмасам, мен сени шеърдан.

Йиллар ўтиб кетди, юрагимизда,
Қолдириб ҳам яхши, ҳам ёмон изни.
Тўғри, беролмадим, қалбимни, афсус,
Бироқ беролдим-ку, энг гўзал ҳисни...

- **ЎЗИ СИЗГА КЕРАКМАНМИ?**

Кетолмадим, ёрим сиздан кўнгил узиб,
Рози бўлинг, ташлаб кетай юрагимни.
Яшолмайман энди ортиқ кўзим сузиб,
Мен билайин, ўзи сизга керакманми?

Йўқса, бекор сиз деб тонглар отганлари,
Кўзингизнинг кўзларимга ботганлари,
Ғурурни ҳам муҳаббатга сотганларим,
Кўнглингизнинг тубидаги тилакманми?

Кетолмайман ёрим сиздан кўнгил узиб...

ИШҚНИ БИЛМАЙ...

Бездим дунё ташвишларидан,
Шу ёшимда мен ундан тўйдим.
Зарра қадр топмади қадрим,
Хато қилдим, мен уни суйдим.

Сездим, менга қалбида жой йўқ,
Билдим, ишқим керакмас сизга.
Бугун сизни дуо қиламан:
Ишқни билмай киринг сиз юзга...

Бездим дунё ташвишларидан...

СИЗДАН ТОНА ОЛМАДИМ

Нима бўлди сизга, оғажон
Дардларингиз била олмадим?
Нега сиздан ўзга маҳбубни,
Назаримга ила олмадим?

Меҳр тансиқ дунёлар ичра,
Меҳрингизга қона олмадим.
Юрагимдан кечсам кечдимки,
Лекин сиздан тона олмадим.

Ташвишимни сизникидан ҳеч
Нетай, устун қўя олмадим.
Ҳеч кимсани, қасам ичаман,
Сизнинг каби суя олмадим.



ЮРАГИМ ЮРАКМАС СИЗСИЗ

Сизга малолмасми, менинг борлигим...
Гулжамол

Ўзимга эп билсам Лайли ишқини,
Сизга бахт келтирса, сизга ёрлигим.
Севгим ҳаром эмас, севгим ҳалолми,
«Сизга малолмасми, менинг борлигим!»

Бахтни кутиб, қаранг, рангим сарғайди,
Сизга хуш ёқами, сизга зорлигим.
Уволи тутмасин ишқини, қарғайди,
«Сизга малолмасми, менинг борлигим!»

Менга ишқ дунёси керакмас сизсиз,
Сиз кетманг, аёндир сизсиз хорлигим.
Не қилай, юрагим юракмас сизсиз,
«Сизга малолмасми, менинг борлигим!»



ЧЎЛ ДЕМАНГИЗ ХОРАЗМНИ

*Хоразмни чўл деб мени ранжитган бир дўстимга
ярим ҳазил, ярим чин маъносида бағишлов...*

Чўл дедингиз сиз Хоразмни,
«На боғи бор ва на-да тоғи».
Билмай туриб сўзламангиз ҳеч,
Ў, уларнинг йўқдир саноғи.

Чўл демангиз сиз Хоразмни,
Жалолиддин тоғи бор, ахир,
Ахир, асов Жайҳуни бор-ку,
Гарчи, суви тузли ва тахир.

Янгилишдингиз шу ерда бир оз,
«На боғи бор ва на-да тоғи».
Қайси боғдан кам, ахир, айтинг,
Шоир Феруз, Огаҳий боғи.

Ал-жабрга асос солди-ку,
Ал-Хоразмий таълимотлари,
Ёзсам ахир минг китоб бўлар,
Хоразмнинг маълумотлари.

Қанча одам келиб-кетади,
Тавоб учун Маҳмуд қабрини.
Гўзаллиги бошига етиб,
Чеккан халқим ганим жабрини.

Наҳот, сизни жунбушга солмас,
Комилжоннинг тори сеҳрли.
Одамлари бордир меҳмондўст
Одамлари унинг меҳрли.

Хоразмнинг бурунчи* ширин,
Дехқонининг қўли қадоғли,
Сиз, яхшиси, бир келиб кетинг,
Азиз меҳмон бўлинг, ардоғли.

Бу гап менга огир ботади,
Чўл демангиз сиз Хоразмни,
Мен ҳам, ахир, шу «чўл» қизиман,
Шундай гўзал, кўҳна азимни.

ҲУЗУРИНГГА КЕЛДИМ

Ҳузурингга келдим, мана мен,
Узрларим қабул эт, маҳбуб.
Гарчи сенсиз узоқ яшадим,
Юрагимга осганимча қулф.

Гарчи сенсиз узоқ яшадим,
Билмай гуноҳ, билмай не савоб.
Хоҳла ўлдир, хоҳласанг кечир,
Хоҳла жон бер, хоҳла эт хароб...

* *Бурунч - гурунч (Хоразм шеваси).*

МЕН КЕТЯПМАН КЕЛАЖАК ТОМОН

Бу кунимиз қайғу ва доғли.

А. С. Пушкин

Бу кунимиз қайғу ва доғли,
У-эртамиз нурга йўғрилган.
Керак эмас бунда сиқилмоқ,
Инсон яшаш учун туғилган.

Бу дунёда неки бор, ишон,
Бир кун келиб унут бўлади.
Ҳар нарсани давосимиш вақт,
Буни яшаб кўрган билади.

Ҳали туйиб улгурмовдим ҳам,
Бахтнинг қолди оғзимдан таъми.
Очилмайин сўлган гунчаман,
Адо қилди муҳаббат гами.

Адо қилди мени бу ҳаёт,
Мен мағлубман, чиндан-да бугун.
Аммо ҳали узоқ яшайман,
Бир кун голиб бўлишим учун.

Биламанки, ҳаёт шафқатли,
Гоҳи яхши, гоҳида ёмон.
Кечир мени сен бугун ўтмиш,
Мен кетяпман келажак томон.

БИР КУН ТУТАР СЕВГИМ УВОЛИ

Ўзимни хор қилдим ер қадар,
Сенга хор, ўзгага зор қилдим.
Ғурудан кўйлагим бор эди,
Мен уни бекорга дор қилдим.

Кечир сенга кўрмайман раво,
На бирор сўз, на бир арзимни,
Бу ёғига узсам катта гап,
Юрак олдидаги қарзимни.

Жуда кеч англадим хатомни,
Севги бу-умрнинг заволи.
Мен худога топширдим сизни,
Бир кун тутар севгим уволи.

Ўзимни тенг кўрдим ерларга,
Унга хор, ўзгага зор қилдим.
Ғурудан кўйлагим бор эди.
Бўйнимга мен уни дор қилдим...



ҲАЁТ - ШАФҚАТСИЗ УСТОЗ

Ўйинлардан адо бўлдим, рост,
Билдим, ҳаёт-шафқатсиз устоз,
Мен- уқувсиз толиб, шунданми,
Унинг менга марҳамати оз.

Бу нотекис, текис йўлларда,
Мен суянчсиз йиқилдим кўп бор.
Чиндан уни севгандим, ахир,
Энди эса унутмоқ душвор.

Кўнглим қолган у хатолардан
Уларни кўргани кўзим йўқ,
Ҳар дам жангга тайёр тур, юрак,
Токи келиб тегмасидан ўқ.

Ҳаққинг йўқ ярадор бўлишга
Ё ўлим ва ёки ғалаба,
Уқувсиз бўлишдан чарчадим,
Энди бўлгум мен зўр талаба.



ЎЙЛАРИМНИНГ ЙЎҚДИР АДОҒИ

Кечир мени, кечир, худойим,
Ношукурлик қиламан гоҳи,
Мен кўниккан ғамларга, ахир,
Чидолмасди бардошнинг тоғи.

Бекор келдим дунёга, дейман,
Бекор уни суйганман, дейман,
Менинг ғамим унга бегона,
Мен-чи, унинг ғамини ейман.

Узоқларга кетгим келади,
Ўйларимнинг йўқдир адоғи,
Лекин нима қилай мен сизни,
Унутолмай ўтаман, чоғи.



НЕЧУН БУНЧА ҒАРИБСАН, КҮНГЛИМ

Нечун бунча ғарибсан кўнглим,
Бепарвосан гўзал ҳаётга.
У нимадир этган девона,
Ва қул этган сени баётга?

Эгардан ҳам тушмайсан сира,
Бошгинангни урсанг ҳам тошга.
У нимадир шунчалар азиз,
Иложинг йўқ чидашдан бошқа.

МАШҲУР БЎЛИШ...

Айтинг, машҳур бўлиш кимга ёқмайди,
Танилмоқ истайман, бутун оламга.
Ҳою ҳавасга дил берибман, бироқ
Меҳримни бермабман мунис онамга.

Ўткинчи дунёда орзу-ҳавас деб,
Гоҳ у ён, гоҳ эса бу ён чопаман.
Ҳаммаси яхши-я, лекин эртага,
Мен бошқа онани қайдан топаман?!

СОҒИНТИРИБ КЕТДИ-КУ БАҲОР

“Яхши от кейинроқ чопади”,
Қўй ҳолимга, девона хаёл.
Шунча йил алданиб яшадим,
Унутганча эканим аёл...

Қилдим орзу, шоир бўлмоқни,
Ҳавас қилиб Бибихонимга.
Бугун жуда алам қилади,
Қасд қилганим шу ёш жонимга.

Хатоларим кўзимни очди,
Соғинтириб кетди-ку баҳор.
Нима қилай, кечикиб билдим,
Қиёматга қолганин дийдор...



ЯГОНА ИЛИНЖ

Биз бахтли бўламиз, худо хоҳласа
М. Юсуф

Сизни кўрганимдан хурсандман, фақат
Қанийди ишончлар ўзин оқласа,
Мени юпантирар ягона илинж,
«Биз бахтли бўламиз, худо хоҳласа».

- Совуқ ниналар ҳам кор қилмас асло,
Худойимнинг ўзи бизни боғласа,
Яхши бўлди бизнинг учрашганимиз,
«Биз бахтли бўламиз, худо хоҳласа».

Яхши бор, ёмон бор дунёда азал,
Унутинг ёмонлар дилни доғласа,
Ўзи қўшган бўлса, сиз билан бизни,
«Биз бахтли бўламиз худо хоҳласа».



КЕЧИР МЕНИ

Тинч қўй мени, қийнама мени,
Уринишлар барчаси бекор.
Бизни енгди бугун ғанимлар,
Хаёлларим, энди яхши бор.

Тан олмоқ ҳам мардлик-ку ахир
Бу жангни ман берганимни бой.
Тушларимда аён бўлди-ку
Яхши бўлар бу кейинги ой.

Энди сендан яширмайман мен,
Қалбга сени гизлаганимни. *
Ўзим сендан воз кечиб туриб,
Ўзим сени излаганимни.

Мени кечир ва мени тушун,
Ким қилмайди, ахир, хатони.
Худойим ҳам кечирган эди
Момо Ҳаво, Одам Атони.



* *Гизлоганим - Яширганим (Хоразм шеваси).*

СИЗНИ СУЯВЕРАМАН

Сиз томон илк қадам ташласам дейман,
Ўзимнинг ғамимни, о қачон ейман,
Майлига, сиз мени ҳеч қачон суйманг,
Мен сизни, барибир, суявераман...

Ҳеч қачон мени деб овора бўлманг,
Тўлмаган кўнгиллар, майли, ҳеч тўлманг,
Фақат сиз ҳеч қачон устимдан кулманг
Ахир, мен сизни деб куявераман...

Сиз бошқа мен бошқа, йўлимиз бошқа...
Сигиниб яшайман, сабр-бардошга,
Қалбингиз ўхшайди бунча ҳам тошга,
Дардингиз ҳис қилиб туявераман...

Қийналган чоғимда ёнимда йўқсиз,
Янглишиб отганим - отилган ўқсиз.
Сизни деб юрагим қолди-ку чўғсиз,
Мен сизни барибир, суявераман...



БИР ОРТИҚМАС, БИР КАМ БУ ДУНЁ

Бир ортиқмас, бир кам бу дунё,
Дунёларда ҳаққим кўп ҳали.
Эҳтимолки, ҳаёт гўзалдир,
Сенга бўлган ишқим туфайли.

Бир туғилиб, минг бора ўлдим,
Ўлим даҳшат сололмас, фақат
Бунда қалбсиз яшаш даҳшатли,
Қалбим беги, тилайман шафқат.

Бу кунларга, у кимлар етди,
Не кимсалар қилмади армон.
Ишон, сени яхши кўраман,
Ишон, сени кўраман ёмон.

Бир ортиқмас, бир кам бу дунё,
Дунёларда ҳаққим кўп ҳали.
Эҳтимолки, ҳаёт гўзалдир,
Сенга бўлган ишқим туфайли.



ЎЛИБ АЙРИЛАСИЗ ЭНДИ СИЗ МЕНДАН

Ўлиб айриласиз энди сиз мендан,
Мен ҳам ўлсам керак, сиздан айрилсам.
Бир бора синган ку, ахир қанотим,
Қандоқ қилар экан яна қайрилсам.

Сиз мени севсангиз арзимабманми,
Осмонлар узилиб тушами ерга.
Мен сиздан кетмайман энди ҳеч қачон,
Қетсам ҳам вақтинча кетаман шеърга.

Ўлиб айриласиз энди сиз мендан,
Лайлининг ишқидай ишқим бор менинг,
Майлига, сиз учун баҳор, ёз бўлай,
Ўзгага эса қиш, кўчам қор менинг.

Ўлиб айриласиз энди сиз мендан...



ХУДО ГУВОҲ ЁЗИ...

Худо гувоҳ ёзи, куйганларимга...
Сизни ҳам чин дилдан суйганларимга.
Ҳаққим-а йўқ эди ёзи кечирсин,
Ёзи берган жондан тўйганларимга.

Балки хатомиди мен каби яшаш,
Хатоми билмаслик адоват, кинни.
Билмам, уятмиди ҳалига қадар,
Ажрата билмаслик ёлғондан чинни.

Ёзи йўқ ҳисларга ем бўлдим қанча
Қийналиб жон берди, беғубор туйғу.
Барибир, сизни ҳеч ёмон кўрмадим,
Яшашга ўргатди изтироб, қайғу.

Худо гувоҳ ёзи куйганларимга...



МЕН СИЗНИ ГУЛДАН-ДА ҚИЗҒОНГУМ

Мен сизни гулдан-да қизғонгум,
Хаттоки қизғонгум кўзимдан.
Мен сизни ҳеч кимга бермайман,
Ёмонми кўп севсам ўзимдан?

Кўрқаман ёмон кўз, суқлардан,
Йўқотгум келмайди ҳеч сизни,
Шундоғам жуда кеч учрашдик,
Қадрлайлик бир-биримизни.

Ёлғиз сиз деб келдим дунёга,
Ёлғиз сиз деб яшасам, ўлсам.
Юрагим ҳам сизга буюриб,
Бугун танҳо сизники бўлса.

Мен сизни ҳаммадан қизғонгум...



СИЗ МАРҲАМАТ ҚИЛАСИЗ ҲАЛИ

Сиз марҳамат қиласиз ҳали,
Гарчи бугун пойгакдаман - хор,
Лекин эрта кетмоғим даркор
Мен ҳам қилиб сизни интизор.

Сиз марҳамат қиласиз ҳали,
Бугун менинг кўзларимда ёш.
Эрта келар сизга ҳам навбат,
Чунки тугар сизда ҳам бардош.

Сиз марҳамат қиласиз ҳали,
Қалбингиздан бериб менга жой.
Менинг ўрним босолмас ҳеч ким,
Бўлса ҳамки, маъшуқангиз ой.

Сиз марҳамат қиласиз ҳали,
Ҳали буни бир кун айтасиз.
Юрагимда сизнинг уйингиз,
Айтинг, уйга қачон қайтасиз?

Сиз марҳамат қиласиз ҳали...



МЕНИНГ ИШҚИМ ҮЙИНМИДИ?!

Айтиб қўяй, менсиз сизнинг бахтингиз йўқ.
Гулжамол

Ким деб атай энди сизни, жоним, айтинг,
Мард бўлсангиз агар энди ортга қайтинг,
Инсофданми ташлаб кетмоқ шундай пайтим,
«Айтиб қўяй, менсиз сизнинг бахтингиз йўқ».

Мен йиғласам, сизнинг кўнгил тўладими?
Энди мендай сизни севган бўладими?
Маили, мендан қалби йўқлар куладими?
«Айтиб қўяй, менсиз сизнинг бахтингиз йўқ».

Нима, сизга менинг ишқим ўйинмиди?
Менга кўнгил бермоғингиз қийинмиди?
Ёки айтинг, менинг баҳом тийинмиди?
«Айтиб қўяй, менсиз сизнинг бахтингиз йўқ».

Гумон қилманг жоним, энди аҳдингиз бор,
Мен севганман, чунки сизнинг шаҳдингиз бор,
Билиб қўйинг, сизнинг мендай бахтингиз бор,
«Айтиб қўяй, менсиз сизнинг бахтингиз йўқ».



ТИЛЛА БАЛИҚ

А.С. Пушкиннинг «Тилла балиқ ва балиқчи чол» ҳақидаги эртагини ўқиб...

Тилла балиқ, тингла балиқ,
Кел, илингин қармоғимга,
Сулаймоннинг узугини
Тақиб қўйгин бармоғимга.

Сен айтган у шаҳзодани,
Яна қанча айт, кутаман.
Хаёлимда ўзга биров,
Лек ўзгага гул тутаман,

Яна қанча ўзи бошқа,
Сўзи бошқа бўларман-о.
Бир кун келар, ахир, мен ҳам
Тўлин ойдаи тўларман-о.

Йўллар юрдим жуда узоқ,
Бироқ ҳали манзил олис.
Сўраганим, энг аввало,
Ниятимни қилгин холис.

Бахтсиз бўлиш бунча осон,
Бунча қийин бўлиш бахтли.
Тилла балиқ, тингла балиқ,
Қилгин мени тожу-тахтли.

Нима қилсанг, қилу, аммо
Қўлла мени бир дуода:
Армонларим бўлмасин ҳеч
Шу яхши - ёмон дунёда...

МУНДАРИЖА

Кўнгил сизни тарк этмасин (М.Раҳмон).....	3
Бахтдан сархуш бўлайин.....	5
Тўмарислар ўтган замин бу.....	6
Юрагингиз меҳмонию мезбони бўлай.....	7
Ҳар ҳолда умид бор.....	8
Энг катта орзум.....	9
Менинг ибодатим.....	10
Зардўзингиз.....	11
Юрагингиз берсангиз бўлди.....	12
Энди сиз деб ўлайин.....	12
Қиёматга қолмасин дийдор.....	13
Яхши эди у ўтган кунлар.....	13
Худо, ёлғиз қилма аёлни.....	14
Жонимни қийнама, жоним.....	14
Ҳали шундай кунлар келади.....	15
Алдашдан кўрқаман.....	15
Муҳаббат деб ўлайми энди?!.....	16
Худо, сенинг борлигинг яхши.....	17
Соғиндим.....	17
Сиздан бошқа йўқмиди менга.....	18
Орзу изтироби.....	18
Юрагингиз ўғримиди?.....	19
Куйган бу дилимни куйдирди ёмон.....	20
Сен учун қайтадан туғилдим.....	20
Дилим ёниб кетяпти.....	21
Ўтган куним.....	22
Ҳаёт, марҳаматинг аяма мендан.....	23
Имконлар тирик.....	24
Сен мени кечиргин, юрагим.....	25
Курашади савоб-гуноҳлар.....	26
Кўргуликлар бир ўзимники.....	27
Мен эртага бахтли бўламан.....	28
Бир куни мен учиб кетаман.....	29
Худо берсин менга сабрни.....	30
Яшамоқ ҳам келса-я малол.....	31
Ўнгимда ҳам келгин, хумо қуш.....	34
Бунча оғир сизга қараш.....	35
Мен учун ўзингиз борсиз.....	36

Майлими, мен сизга тоғ деб суянсам.....	36
Худойим ҳам ёрдир-ку!.....	37
Сен олдимга қайтгин Хумо куш.....	38
Сизни севиш келар кўлимдан.....	39
Мен дунёда энг бахтли аёл.....	40
Кечирим.....	40
Ўзи сизга керакманми?.....	41
Ишқни билмай.....	41
Сиздан тона олмадим.....	42
Юрагим юракмас сизсиз.....	43
Чўл демангиз Хоразмни.....	44
Ҳузурингга келдим.....	45
Мен кетяпман келажак томон.....	46
Бир кун тутар севгим уволи.....	47
Ҳаёт - шафқатсиз устоз.....	48
Ўйларимнинг йўқдир адоғи.....	49
Нечун бунча ғарибсан кўнглим.....	50
Машхур бўлиш.....	50
Соғинтириб кетди-ку баҳор.....	51
Ягона илинж.....	52
Кечир мени.....	53
Сизни суявераман.....	54
Бир ортиқмас, бир кам бу дунё.....	55
Ўлиб айриласиз энди сиз мендан.....	56
Худо гувоҳ ўзи.....	57
Мен сизни гулдан-да қизгонгум.....	58
Сиз марҳамат қиласиз ҳали.....	59
Менинг ишқим ўйинмиди?!.....	60
Тилла, балиқ.....	61

Ушбу китобимни нашр эттиришда ўзининг беминнат ёрдамчини аямаган мурувватли инсон Наманган вилоят Кенгаши депутати, ЎзФМД партияси Косонсой туман Кенгаши 1-котиби Мўминжон ака Қосимовга ўз миннатдорчилигимни билдираман.

Муаллиф.

Адабий - бадиий нашр

КУМУШ

(Сайёра Солаева)

СИЗ МАРҲАМАТ ҚИЛАСИЗ ҲАЛИ

Шеърлар

Муҳаррир: Дилором

Мусаввир: А. Дадабоев

Тех. муҳаррир: Н. Жабборов

Мусахҳих: М. Қодирова

Теришга 2005 йил 18 августда берилди. Босишга 2005 йил 25 августда рухсат этилди. Бичими 60x84. 1-16. Ҳажми 4,0 босма табоқ. Оқ қозоғга офсет усулида bosилди. Тиражи 2000 нусха. 4728-бўйртма. Баҳоси келишилган нархда.

«Фарғона» нашриёти.

*712014. Фарғона шаҳри, Соҳибқирон Темури кўчаси,
28-уй.*

*Ибрат номли bosмахона (ОАЖ). (Наманган шаҳри, Илҳоний кўчаси,
36-уй) да chop этилди.*